

ESTD : OCTOBER, 1994
THLA TIN CHHUAK CHANCHINBU

JULY 2018

Kristian Naupang



Vol. 24 Issue No. 287



Syria tualchhung indona chu naupangten an tuar hle!

Lungawina..... 22

HSLC topper interview10

Stephen Curry16

Thil mak pasarih14

Vol. 24

July 2018 Issue

No. 287

Editor

Upa C. Lalbiaktluanga

Managing Editor

Rev. Dr. C. Chawngmingliana

Joint Editors

Lalremmawia

Upa B. Lalhmunliana

John Lalhruaitluanga

Upa Dr. C. Vanlalhruaia

Circulation Manager

Lalfakzuala

K R I S T I A N N A U P A N G

Synod Office First Floor
Mission Veng, Aizawl – 796 001

Phone – 0389-2324590

e-mail:

kristiannaupang@gmail.com

A man pe duh leh a bu la duh
chuan Circulation Manager
hriattir tur a ni.

Kum khat lak man ₹ 50

Thla khat lak man ₹ 4.16

Kristian Naupanga thu chhuahte hi Editor ngaih dan a ni vek kher lo.

A chungha thu awmte	Phek
1. Editorial	1
2. Charlie-a chu a kal ve lo	2
3. Lungawina	7
4. <i>Biangbiakna</i> : HSLC Topper	10
5. Thil mak pasarih	14
6. Stephen Curry-a	16
7. Duhthlanna dik	20
8. God is nowhere	23
9. Hriatzauna Huang	25
10. Chungleng savaten puih an duh	27
11. Hre thei rawh	28
12. Pahom-a chanchin	29
13. Chei rawh le	32
Zawng chhuak rawh	(Inside cover)



VANRAM LEH HREMHMUN

Mi thenkhat chuan vanram a awm an ring a, hremhmun hi a awm tak tak an ring thei lo. An rin lohna chhan pakhat chu Pathian hmangaihnaa khat, khawngaihna leh ngilneihnaa khat chuan chatuana tawp tawh ngai tawh lo tura mihringte nghaisakna hmun tur a siam chu an ring thei lo a ni. “Mihringte kan soal lohna tura vaukhanna mai mai a ni ang,” an ti bawk.

Pathian hian lei leh van a siam a, tuifinriat leh khawmual te, chhun leh zan te, thim leh eng te a siam tih i awih ang bawk hian vanram leh hremhmun pawh hi a siam tih ring ang che. Isua ngeiin Gehenna, mei mit thei lova kal chu hlau turin min hrilh ngawih ngawih a ni. Hremhmuna kan kal lohna turin Isua chu krawsah a thi a, chumi ring duh miah lote chu Pathian hmelma, Pathian dodal an ni.

Tunah hian thi thut thei kan ni reng a, *accident* eng pawh kan tawk thei. Thi thut thut an awm reng tih kan hria. I chungah leh ka chungah pawh hian thih thutna hi a thleng ve thei reng a ni. Tek den hlum te, lirnghing avanga thih thutna te, kan fimkhur loh vang pawh ni lova thih thutna te a lo thleng thei. Thi thut ta la, vanramah nge i kal ang hremhmuna tih hi ngaihtuah la, vanrama kal ngei turin inbuatsaih nghal ang che. Hremhmun awm i rin loh chuan Isua hi dawt sawi thinah i ngai tihna a ni.

CHARLIE-A CHU A KAL VE LO

– *Francis Lalruatpuia Tlau
Mission Vengthlang*

Sap ram thingtlang khaw pakhtah hian naupang pathum – Charlie-a, George-a leh Cliff-ate an awm a, an pathum chuan thian inkawmngaih tak an ni a. An pathuma an awm tawh chuan thian dang an ngai reng reng lo va, an khaw bul lawka luiah te kalin sangha an man thin a, an hlimin nuam an ti em em thin a ni.

An lo thang lian zel a, High School kal rual an nih thlengin an inkawm zel a, motor khalth te an rawn thiam a, an nu leh pate motor te hawhin, lui hla deuh zawkah te kalin sangha an man thin a, nuam an ti em em thin a ni.

Ni khat chu Cliff-a pa motor-in hmun pakhtah kal turin an tlan chhuak a. Cliff-a chuan a thiante hnenah chuan, "Thiante u, vawiin chu ni danga kan la kal ngai miah lohna hmun, hmun nuam leh dangdai deuhvah ka hruai ang che u," nui deuh sang chungin a ti a. Motor-a chuan pah chuan an naupan deuh laia an hla ngaihthlak thin te chu an ngaithla a, an zaipui vak vak baw k a.

Tichuan, an tlan thui zel a, Charlie-a leh George-a chuan an tlanna lam chu an la kal ngai loh avangin mak an tiin an bo deuh hu mai a.

Tichuan, Charlie-a chuan hlauthawng deuh tak chungin Cliff-a hnenah, "Hei, thian-pa, kan kalna tur hi i hre chiang meuh maw?" a ti a. "Aw, hre chiang tehreng mai. Min ring rawh. Kan thlen hunah eng nge kan hmuh dawn tih pawh chiang takin ka hria," tiin Cliff-a chuan a lo chhang vat a.

A tawpah chuan Cliff-a chuan kawngpui atanga penguin kawng te zawkah a tlanpui ta a, an tlan thui deuh hnu chuan kawng chu a chhiain a sawh nasa em em mai a, an tlan zel a. A thiante

pahnih chuan, "Sangha manna tur hmun dangdai tak kan thleng dawn a nih hi," tia an ngaihtuah lai chuan an hma zawna tlang sang tak mai ding luah hi an va thleng ta a. Cliff-a chuan car chu a tiding a, a chhuak ta a. George-a chuan car atanga chhuah pahin, "Hei, Cliff-a, hei hi kan kalna tur hmun chu maw ni a? Eng nge a awmzia?" a ti a.

Cliff-a chuan tlang chhip lam chu melh chhoh pahin, "Aw ni e, he lai hmun ngei hi a nih hi ka hruai duhna hmun che u chu," tiin a chhang a.

Charlie-a chuan, "Mahse, hei, Cliff, sangha dil

pawh a awm miah loh hi," a ti a.

"Ni e, dil chu awm miah lo. A hmasa berah chuan tlang chhipah khian kan lawn chho vang. Mahse, motor-a kal lovin kein kan lawn ang," Cliff-a chuan a ti a.

George-a chuan, "Kan tiang leh kan sangha manna tur nghakuaite hi kan keng dawn em?" a lo ti a. "Aih, keng lo vang. Kan mamawh dawn hlei nem," tiin Cliff-a chuan a chhang a.

Charlie-a chuan mak a tih avang leh a nin deuh tawh avanga thinrim deuh tak chungin, "A nih leh eng thil nge tlang pang lehlamah chuan kan va hmuh dawn a?" a ti a.



"Pathian," tiin Cliff-a chuan a lo chhang vat a.

"Pathian kan hmu dawn a maw?" tiin a thiante pahnih chuan mak ti tak chungin an zawt a.

"Aw, ni e. Pathian kan hmu dawn, tlang pang lehlamah khian Pathian a awm a ni," tiin Cliff-a chuan a chhang a.

"A nih leh Pathian chuan chutah chuan eng nge a tih a?" tiin George-a chuan a zawt a.

Cliff-a chuan, "Min lo nghak maw le. Khi tlang khi kan lawn chhuah hunah chuan Pathian kan hmu ang a, a thusawi kan hria ang a, hmaichhanah kan hmu dawn a ni. I kal chho thuai ang u," tih pahin tlanga lawn tumin a in her a.

"Ngawi lawk teh, eng nge i sawi awmzia chu? Khi tlang kan lawn chhuah hunah khian kan thi ang a; tichuan, Pathian hnenah kan kal dawn i tihna em ni?" tiin Charlie-a chuan Cliff-a dara vuan chungin hlauthawng hmel takin a zawt a.

"Ni lo ve, chutiingin a nih ka ring lo. Engtin nge kan

awm dawn tih kan hriat theihna awm chhun chu tlang chhipa kan lawn chhuah phawt hi a ni. In inpeih em thiante u?" tiin Cliff-a chuan a lo chhang a.

"Aih, aih, aih, ni lo ve. Hei hi thil atthlak tak a ni. Mi tu mah Pathian hmu turin tlang chhipah an lawn ngai lo," tiin George-a chuan a lo hnial a.

"Lawn thin tehreng mai. Vawiin hi kan kal ve hun a nih hi. I kal ang u le," Cliff-a chuan a ti a.

"Lo ngawi lawk teh thianpa, he thil hi a atthlak i ti lo vem ni? He lai hmunah hian thil atthlak tak ti turin kan kal lo," tiin Charlie-a chuan a lo chhang a. "Ka hre lo le Charlie," tiin George-a chuan a chhang a. "Pathian chu khi tlang chhipah khian a lo awm tak tak a nih chuan Amah hmu tura kal tum miah loh chu thil atthlak tak a ni zawk ang. Tirawh u, thiante u, i han fiah teh ang u," George-a chuan a ti a. Tichuan, Cliff-a leh George-a chuan tlanga lawn chu an tum ta a. "Lo lawn ve i tum em Charlie?" tiin George-a

chuan an hnunga ding George-a chu a va zawt a.

"Khawngaihin lo ngawi lawk teh u thiante u," tiin Charlie-a chuan a hmaia thlan luang zawih zawih chung leh a mita mittui tling par chungin a lo ngen a. "Eng nge ni ta, thianpa? Harsatna i nei em ni?" tiin George-a chuan Charlie-a awmna lam Cliff-a nen an pan lai chuan a zawt a.

"Ka kal ve thei lo vang. Vawiinah hian Pathian chu ka hmu ve thei lo vang. Ka sual em mai! Sual zep ruk keimahah hian a tam lutuk. Ka nu leh pate, zirtirtute thu te ka awih lo thin a. Pathian chu ka hmu ve ngam lo a ni," tiin chia i tak chungin Cliff-a chuan a lo chhang a.

"Mahse, Pathian chuan i sualna zawng zawng chu a hre sa vek alawm. Pathian chuan i sualnate chu ngaihdam a duh em em a. A thian atan a sawm che asin. Tlangah khian han lawn ila, chutah chuan sual ngaihdamna famkim leh Pathian thian nihna chu a awm asin. Lal Isua'n krawsa kan sual tlanna tura a nun a pek avang

khan. Chu chu i duh lo vem ni, Charlie?" tiin Cliff-a chuan zawt chungin a hrilhfhah a.

"Aw, a tha alawm. Ni lo, ka hre lo le. Ka hlauthawng a ni Cliff. Ka thlan a luang zawih zawih mai. Ka kal thei lo vang. Min kal luihtir lo mai rawh u. Hun dang a awm leh mai ang. In pahnihin han kal ula, Pathian hnenah chuan ni danga ka kal tur thu min lo hrilhsak dawn nia," Charlie-a chuan a ti a.

A thiante pahnih chuan Charlie-a chu an kianga thingkung tlu chungah chuan an thut hahdamtir a, tui in tur an pe bawk a. "Aw le, Charlie, Pathian chu kan lo hrilh ang e. Hetah hian lo awm la, kan han lawn ang e," Cliff-a chuan a ti a. Tichuan, Cliff-a leh George-a chu an lawn chho ta a. Charlie-a chuan a ruka nuam lo ti tak chungin a lo thlir a. A rilruah zawhna tam tak a lo lut a. "Hun remchang dang lo nei ta lo ila, engtin nge ni ang? Pathian nena kan inthian hmain lo thi ta ila, engtin nge ni ang?" tiin a ngaihtuah ta

vak vak mai a. A inngaihtuah harh thut a, a thiante han um chu a tum a; mahse, an lo kal bo tawh avangin a hmu pha tawh si lo. Tichuan, Charlie-a chuan a hmai a hup a, a tap ta a. Pathian ngaihdamna chang turin a thiante rualin tlangah a kal ve ngam lo va, tunah chuan a tlai zo tawh a ni, a thianten an kalsan tawh si a.

Keini Kristian naupangte pawh hian thil kan tisual ve thin a, kan nu leh pa te, kan zirtirtute thu pawh awih loh chang kan nei thin a. Pathian duh loh zawnga awm chang pawh kan nei ve theuh thin a ni. Nimahsela, kan thiltih

sualte ngaidam tura Pathian hnenah kan tawngtaia, a hnen kan pan chuan Pathianin min ngaihdam a chak em em a, a bula kan awm a duh em em reng a ni.

Charlie-a pawh hian a sualnate chu a hria a, a nu leh pa leh an zirtirtute thute a awih loh thinte chu a hria a, a hlauthawng a, a mangang a; nimahsela, Pathian ngaihdamna chang tur leh, Pathian thian ni tura a thiante ruala tlangah a lawn ve loh avangin Pathian ngaihdamna a chang ve ta lo a ni.

Chu vang chuan Charlie-a chu Pathian hnenah a kal ve dawn lo a ni.



LUNGAWINA

– Lalnunpuia
Sacrament Dept. zirtirtu
Aizawl Venglai Kohhran

Mihring duhna hi tawp chin nei lo a ni. A aia tha, a aia tam, a aia mawi duh zel thin kan ni. Kan duh zawng apiang neih theih a ni lo va, neih sen pawh a ni hek lo va, nei mah ila kan tan a tha kher lovang. Chuvangin, lungawina chin kan insiam chawp a ngai thin a, mi thenkhat chu an lungawina chin a hniam deuh va, thenkhat a sang deuh thin. Kan lehkha zirnaah a ni emaw, kan inchei danah a ni emaw, kan thlen tum chinah emaw, kan lungawina chin chu neih ngei tumin kan bei thin a ni.

Kan lungawina a dang ang bawkin kan thlen chin pawh a dang thin. Hmanah chuan ram hrana mite nena kan inbiak pawh theihna chu lekhathawn a ni a, a kal hun chhung a rei em em thin a, kawnglakah tibuaiteu tam tak a awm thei a ni. Chu chu tuin emaw tha tawh lovin a hria a, a lungawipui zo tlat lo. Tichuan, a aia awlsam zawh thirhru (telegram) a siam chhuak ta a, chumi hman chuan mi tute emaw thui tak tak an kal kher ngai lovin a inbiak theih ta a ni. A hnu deuhvah chuan thirhru chu

tuin emaw a lungawipui zo lo leh ta a; tichuan, telephone an siam chhuak leh a, chu mai pawh chu duh tawh lovin kan awmna hmun apianga hman theih tur mobile phone an siam chhuak leh ta a ni. Lehkha inthawn kha lo lungawipui hliah hliah se, a nih loh vek pawhin thirhru kha lo lungawipui ta viau se, tun kan thil neih tam tak hi kan neih kher a rinawm loh.

Lungawina hi kan thil hriat sa atanga kan siam thin a ni a, kan thil tawn te, kan zirlai atang te, kan lehkha chhiar te, kan thil hmuh atang tein kan

siam fel thin. Kan lungawina chin a san leh san loh hian kan hma lam hun a hril thui hle. A tawi zawngin, kan duh, kan mamawhna leh kan lungawina chin ang zelin chumi tihlawhtling tur chuan kan bei mai thin a, chu chuan kan hmasawn danah thui tak sawi a nei thin. Tute emaw chu an exam-ah an pass tawh tawh chuan an lungawi viau mai thei. A then chu Top 3-ah lang mah se an lungawi zo kher lo mai thei. Chu lungawina leh lungawi lohna chu an danglamna hmasa ber a ni a. A dawta chuan, an lungawina chin tal nei thei tura an thawh rim leh rim loh a ni leh a ni.

Mi tin hian thil eng emaw, min tiphur (motivate)-tu kan mamawh thin. Mi tu emaw a lungawina chin a hniam viau chuan, awlsam takin a thleng thui a, a bak thleng leh turin duhna leh tumna tak tak a neih loh phah thin. Mi tumruh kan tih, a lungawina chin pawh sang taka dahtu chuan a nih tum ang thleng tur chuan thiltih a neih a ngai tih a hre reng thin.

Mihring kan inang lo va, theih zawng, thiam zawng pawh a inang vek lo. A then chu thiam thei deuh te, rilru chak deuh te an ni a; a then chu rilru chak lo deuh te an awm thei. A tawpah chuan thlen chin tur mumal tak insiama, theihtawp chhuaha bei tauh tauh thin te bawh hi an hlawhtling leh thin. Talent nei tha tak tan chuan miin an beih chiam kha harsa lutuk lovin a ti thei a ni mai thei. Mahse, talent nei tha zawng zawngin an hlawhtlinpui kher lo tih chu kan hriat sa vek a ni.

Malcolm Gladwell-a lehkhaw ziah 'Outliers'-ah chuan mi hlawhtling tia kan sawi thin mi tam tak zir chianna a awm a. Chutah chuan heti hian a inziak: 'Mi hlawhtlingte hi talent nei tha chungchuan an ni kher lo. Talent chu an nei tehmeuh mai; mahse, an talent leh thawh rimna tang kawpin an hlawhtlinna hi a siam chauh zawk a ni. Khawvela band lar ber tia chhal ngam, *The Beatles*-ah khan khawvela **guitar** thiam ber ber te, zai

thiam leh aw dik ber ber te an awm khawm chuang lo va, khawvelin anmahni a hriat hma hauh hian, an thlen chin thleng tur hian darkar 10,000 chuang tehmeuh, ngawrh takin an practice ho a ni, tiin.

Tum i nei a, i tum chu tihlawhtling turin theihtawp chhuah i chak zek zek bawk a, nangmah ngei pawh i thawk tan tawh. Mahse, chuti mai chuan hlawhtlinna chu a la awlsam lo cheu tih hriat tel a ngai ve thung. Intlan-siaknaah pawh motor tha tak, chak taka tlan, a tlan chak a ni tih hriat ngawih ngawih khawpa ri thum nalh pawh kawng tluang pangngai takah a che sual fo a ni. He'ng chetsualna thenkhat hi chu mihringin a pumpelh theih loh, khawl fel loh vang emaw, vanduaia liau liau emaw a ni thei a.

Chutih rualin, a tam zawk chu a khalhtu tihsual vang a ni ber. Chutiang chiah chuan duh em em si, thawk rim em em bawk si kha kawnglakah a chesual thei tih hriat reng tur a ni. Chu-

vangin, kawnglaka che sual lo tura mahni inven ve reng a ngai a ni.

A tawp berah chuan, kan ziah tawh zawng zawng kha i ti vek a nih pawhin i thlen tum chu i la thleng kher lo thei. Chumi hunah chuan hlawhtlinna chu engtin nge i teh tih i en nawn a ngai ve thung tawh mai thei.

He thuziak i chhiar chung zawng khan i rilrua hlawhtlinna lang chu sum leh pai leh mi hriat hlawnna lam a ni ber ang. Mahse, mi tam tak hian hlawhtlinna hi sum leh pai hmangin an teh vek kher lo tih hriat ve a pawh mawh. Tute emaw lungawina chu chhungkaw hlim tak neih emaw, mite tana malsawmna ni thei tura thawh emaw a ni thei. Khawvel awm chung zawngin mi hausa leh mi rethei hi kan awm reng dawn.

Pathian malsawmna hi sum leh pai zawngin i hmu kher lo a nih pawhin, kan lung-awina hi keimahni siam chawp a ni tih hriat reng a tha a ni.

LALREMSIAMA DARCHHUN HSLC EXAM 2018-A PAKHATNA KAWMNA



Khawvela kan awm chhunga mihringte tuihalna pakhat zirna kawnga intlansiakna pawimawh tak, tu man kan ngaihnepe theih reng reng loh, tangka suma lei theih ni miah si lo, thluak tha bik, vannei bikte chauhvinn an thlen theih, kum 2018 HSLC exam beitu zawng zawng mi 17,695 zinga pakhatna ni thei Lalremsiama Darchhun s/o Vanlalpeka, Tanhril, St. Paul's HSS-a kal chu *Kristian Naupang Chanchinbu* Editorial Board chuan zawhna tlem te a zawt a, a chhanna chu -

KN- Kristian Naupang Chanchinbu
LD- Lalremsiama Darchhun

KN- I pian ni, thla leh kum min hrilh thei em?

LD- Ni 19, December 2001.

KN- I nu leh i pa hming min hrilh thei em?

LD- Ka pa hming chu Vanlalpeka a ni a, ka nu hming chu Lalthleng-liani a ni.

KN- Pianpui unau eng zat nge i neih?

LD- Unau pathum ka nei a, mipa pakhat leh hmeichhia pahnih.

KN- I nu leh i pa hian eng hna nge an thawh? Tanhril khaw hlun reng em ni in nih?

LD- Ka pa hi chu a thi tawh a. Ka nu hi thil hrang hrang, secondhand te zuarin a inhlawh thin. Ni e, ka nu leh pate hi Tanhrila piang ve ve an ni.

KN- St. Paul's HSS-ah i kal a. Tanhril atangin em ni i kal thin?

LD- Ni lo ve, Tlangnuamah
LR Hostel-ah ka awm
thin.

KN- Darchhun hnam hi hnam
vâng tak in ni em?

LD- Darchhun hi Chhangte
hnam peng pakhat a ni
a, hnam vâng tak chu a
ni lem lo.

KN- Zirna kawng i zawh
chhoh dan min han hrilh
teh. Khawi sikulahte nge
i kal thin? Exam-ah i
tiṭha thin em? Eng di-
vision-ahte nge i pass
thin?

LD- Nursery hi Tanhril P/S
I-ah ka kal a; KG-I leh
Class-I hi Leslie Memo-
rial School, Tanhrilah
ka kal a; Class II-IV hi
RS School-ah ka kal leh
a; Class VII & VIII hi
St. Andrew's School,
Luangmualah kalin,
Class IX aṭangin St.
Paul's HSS-ah ka
chhunzawm ta a ni.
Exam-naah hian Pathian
zarah pakhatna ka ni ve
thin.

KN St. Paul's HSS-a i kal
chhungin Class IX leh X

term exam-ahte pakhat-
na i ni ngai em?

LD- Pathian zarah term
exam-ah hian pakhatna
ka ni tluan ve.

KN- Lehkha i zir hian zing,
chhun, tlai leh zanah
engtia rei nge i zir thin?
I zir dan tlangpui min
han hrilh teh.

LD- Lehkha hi zing lamah ka
zir ngai lo va. Chhun,
tlai leh zan lamah hian
chawhrualin ni tin
darkar 3-6 ka zir tlang-
pui ang. Ka zir hun bi
hi a danglam a, a
changin ni khatah darkar
2 lek te ka zir a. Exam
dawn chuan a aiin a tam
hret ang. Ka zir rei ngai
lo va, rilru pe takin ka
zir thin a, ka thiam hma
chu ka zir mai thin.

KN- I chhungten smart-
phone an leisak tawh che
em? Pawl eng zat i nihin
nge an leisak che?

LD- Leisak lo.

KN- Smart phone hi i zirna
atan i hmang ṭangkai em?

LD- Hman ve chang chu ka
nei.

KN- I nu leh paten lehkha zir turin an tir thin che em? Nge, 'I zir nasa lutuk' an ti zawk che?

LD- Tir ngai lo. A tul a nih chuan ka zir mai a, a tawka tih chuan ka zir tawh lo mai a, ka chhungten min ti lui ngai lo. Ka result-a chhuaha an hlim hmel chu lehkha zir zel tura min fuihtu a ni thin.

KN- HSLC-a topper nih hi i tum reng nge ni a, i vanneih avanga hetiang hi thleng ni ang?

LD- Topper nih hi ka chak ve thei hle a; mahse, ka beisei pha ngai lo. Topper nih tumin ka zir lo va, theihtawp ka chhuah ve mai a, mi dang phu tak tak zingah ka lo ni hlawl mai a ni.

KN- In result chhuah ni khan topper i ni tih tu'n nge rawn hrilh che? In result chhuah lai tak khan khawiah nge i awm? Engtin nge i lawmzia i tihlan?

LD- Result chhuah ni khan kan inah kan awm a, ka

rank la hre lovin ka mark chiah chu ka patean min rawn hrilh a, a hnu deuh lawkah ka thianpa Ramsangan phone-in min rawn hrilh a. A tir chuan ka awih lo va, mak ti si, lawm bawka si chungin ka zuang vak vak mai a ni.

KN- High School i kal chhungin mathematics-ah emaw, subject dangah pawh sikul pawn lamah tuition i la ngai em? La ngai ni la, engtia rei nge i laka, khawi hmunah nge?

LD- La ngai lo.

KN- I sikul kalna St. Paul's HS School hi result an nei tha thin hle mai a, eng vang nge nia i hriat?

LD- Kan sikulah hian naupangte tan hian competition a sang em em a, zirtirtuten naupang an duat thiam hle bawka. Activity hrang hrangah min inhmantir a, kan khaw hawi a tizau va, kan zirnaah nasa takin min pui thei a, note guidebook leh zirtirtuah

chauh innghat lovin mahnin kan theih ang tawkin kan zir theuh thin. Chungte leh chhan tam tak avangin kan sikul hian result tha a nei thin niin ka hria.

KN- Khawi hmunah nge Pawl XI zir i tum? Eng nge nih i tum? I tleirawlpuite hi han hrilh teh.

LD- Pawl XI hi St. Paul's HSS-ah zir chhonzawm ka tum a. Science lain Nuclear Engineer nih ka tum.

KN- HSLC-a pakhatna ni tura harsatna i tawh leh, high school i kal chhunga harsatna i tawhte min han hrilh teh.

LD- Kan chhungkua hi chhungkaw neinung tak kan ni lem lo va, hei vang hian ka zirna leh hostel fee-ahte kan buai

ve thei hle thin a. Vanneihthlak takin Pathianin a hunah chuan min pe leh mai thin a, ka chhungte hmun hrang hranga mite pawn min tanpui nasa thin hle.

KN- High school i kal chhunga kohhran inkhawm leh sunday school-a i inkhawm dan tlangpui min han hrilh teh.

LD- High School ka kal chhung khan hostel-ahte ka awm avangin ka inkhawm tha vak lo va, Sunday chu ka hman chuan ka inkhawm ve ngei thin.

KN- Pathian fakin i kut i beng ngai em? A nih i lam ve tawh em? I lam nasa nge nasa lo?

LD- Aw, beng ngai e! Lam chu ka lam ve tawh a; mahse, ka lam vak ngai lo.

Mi hlawhtlingte hi talent nei tha chungchuang an ni kher lo. Talent chu an nei tehmeuh mai. Mahse, an talent leh an thawh rimna tang kawpin an hlawhtlinna hi a siam chauh zawk a ni.

THIL MAK PASARIH

– *Lalnuntluangi*
Champhai Vengthlang

Fela chu naupang kum 10 mi, thingtlang khaw te tak tea cheng a ni a. Pawl li a zir zawh chuan an khuaah middle sikul a awm loh avangin a zir zawm thei ta lo va. An khaw thenawma khaw lian zawkah chuan a zir zawm a lo ngai ta a.

Chumi khuaa sikul hming tha tak pakhatath Fela chuan admission a hmu ve ta hlauh mai a. Chu chuan Fela chu a tiphur hle a. Sikul thara kal chu a chak tawh hle a ni.

A sikul luh ni a lo thleng ta. Fela chu phur takin sikul lam panin a chhuak ta a. Kalkawngah chuan a thil tawn thar tur hrang hrangte ngaihtuah chungin

hlim takin a kal zel a. Sikul a thlen chuan an class-room turah chuan zirlai dangte kawhbmuh angin a lut ta a. Zirlai naupangte chuan Fela chu a incheina leh a hmel atang chuan thingtlang atanga lo kal a ni tih an hre thei a, an nuihzat hle a.

Rei lo teah zirtirtu a rawn lut thuai a. Zirlai thar, Fela chu a'n hmel hriattir a. Inngeih taka inkawm ho turin a fuih nghal bawk a. Chutia an hmel hriattir zawh chuan



an zirtirtu chuan *surprise test* a pek tur thu a puang a. An test tur chu 'Khawvela thil mak pasarihte' tih ziah tur a ni a.

Zirlaite chuan phur takin an ziah nghal char char a. Fela erawh chuan a chhang muang hle a. Zirlai naupang

zawng zawngten an chhan zawh hnuah pawh Fela chuan a la ziaak zo ve lo va. An zirtirtu chu va kal hnaiin, "Fela, engati nge? I thiante chuan hmanah an zir tawh a, nang chu i vawi khat lo kalna a nih avangin i thiam dan ang khan hmanhmawh lovin ziaak zel rawh," tiin a fuih pah bawh a. Fela chuan, "Thil mak a tam lutuk a, pasarih chauh chu thlan thiam a har lutuk a," tiin a chhang a! Rei fe hnuah chuan a theh lut ve thei ta a.

Chhannate an theh luh kim takah chuan an zirtirtu chuan a han chhiar chhuak hlawm a. Zirlai tam zawk chuan, 'Thil mak pasarihte chu – The Great Wall, Leaning Tower, Taj Mahal, Hanging Gardens, Stonehedge,

Colosseum' tihte an ziaak hlawm a. An zirtirtu pawh chu a zirtir ang thlapa an chhan avangin a lawm hle a.

A tawp berah chuan Fela chhanna chu a han chhiar ve ta a. "Thil mak pasarihte chu – mita kan hmu thei te, ri kan hre thei te, rim kan hre thei te, kan infiam thei te, kan nui thei te, kan lungngai thei te, mi kan hmangaih thei te hi a ni," tiin a chhang a.

Fela chhanna chuan an zirtirtu leh a zirlaipuite rilru a hneh hle a. Pathian thil thlawn pek ropui bikzia an hriat chhuah thar leh phah a. Lawm thu sawiin an zirtirtu ho chuan an tawngtai ta a. Chumi ni atang chuan Fela chu tu man an nuih tawh ngai lo va, thian tam tak a neih phah ta zawk a ni.



STEPHEN CURRY

‘Mi tichaktuah chuan engkim ka ti thei a ni.’
(Phil. 4:13)

– *Lalrinmawia Colney*
Leader, Intermediate Dept.
Tuikual Kohhran

Stephen Curry-a chu tu nge?

Wardell Stephen Curry II hi March 14, 1988-ah a lo piang a, ft 6 leh inch 3-a sang niin, kg 86-a rit a ni. A pa chu NBA player thin, Dell Curry a ni a; a nu chu College Volleyball player hlui, Sonya Curry a ni. Dallas Mavericks Shooting, Point Guard, Seth Curry hi a nau a ni a; College Volleyball player, Setter, Sydel Curry hi a farnu a ni bawk.

Kum 2011, July 30 khan Ayesha Disa Curry nen inneiin fanu pahnih, Riley Elizabeth (6) leh Ryan Carson (3)-te an nei a, an fa pathumna tur an pai mek bawk. Alamo, California, USA-ah an chungkuain an cheng mek a ni.

Stephen Curry-a leh Basketball : Stephen Curry-a hi *American professional basketball player niin National Basketball Association (NBA)-a Golden State Warriors player (Point Guard) pawimawh berte zinga mi a ni. Player tam tak leh basket-*

ball lama mi thiamte chuan NBA history-a ‘shooter ropui ber’ tiin an sawi hial a ni. Kum 1975 hnu lama a vawi khatna atan Golden State Warriors chu NBA Champion a nihpui a. Kum 2015-2016 season-ah khan NBA history-a Most Valuable Player (MVP) thlangtu (USA & Canada-a Sportswriters leh Broadcasters)-ten MVP atana tha ber (unanimous Vote)-a an thlan hmasak ber a ni bawk.

Stephen Curry-a leh Chawimawina : Stephen Curry-a hian basketball a khelhnaah hian lawmman,



chawimawina tam tak a dawng a, chung zinga pawimawh leh langsar zual deuhte han tar lang ila. Kum 2010-ah NBA All Rookie First Team-ah a tel a, kum 2011-ah NBA Sportsmanship Award a dawng a, kum 2015-ah NBA Three-Point Contest champion a ni a, kum 2015 leh 2016 khan NBA Most Valuable Player (MVP)-ah thlan a ni a, kum 2015 leh 2017-ah Golden State Warriors chu NBA Champion a nihpui a, kum 5 chhung (2014-2018) NBA All-Star Player atana thlan a ni a, kum 2016-ah NBA Scoring champion a ni a, kum 2016-ah

NBA Steals leader a ni leh a. Tin, USA National Basketball Team Player a ni bawh.

Stephen Curry-a – ringtu tha : Stephen Curry-a hi nu leh pa Kristian tha tak nei, zing tin sikul an kal hmaa chung inkhawm nei ziah thin an ni a. Chumi rah chu sengin Curry-a pawh hi Pathian tana mi rinawm leh nun nghet tak nei turin a lo sei lian a, a rinna hi mite hnenah pawh sawi zak lovin a puang darh nasa hle. Pathian biak in ngaina mi tak a ni a, kum 13 mi a nihin tleirawl inkhawmah piantharna a chang a, Isua hi Lal leh Chhandamtuah a pawm a ni. A basketball khelhpuite

hnenah pawh Pathian thu hi a hrilh zel a, an nunah ‘danglamna’ thlentuh nih duh mi a ni a; amaherawhchu, amah ngeiin, “Mi dangte Bible nena han um kual mi chu ka ni lo; mahse, ka rinna chungchang han *share*-a, Isua’n an nunah danglamna a thlen thei a ni tih hi hmuhtir ka duh a ni,” a ti. Curry-a chuan, “Pathian hian eng talent pawh a pe thei che a, a pek apiang che chu a tha thei ang bera tipung tur leh hlawhtling turin a duh che a, taima taka talent tipung tura umzui leh ngawrh taka hlawhtling tura bei turin A duh che a ni. Ropuina kan chante hi mahni tan ni lovin, engkim hi Pathian ropui nan chauh ni zel se, chu ngei chu kan nun kaihruaitu ni se, nangmaha tha ber hai chhuak turin taima takin thawk la; mahse, engkim hi Pathian duh dana tihhlawhtlin hi kan thupui ber lo ni rawh se,” a ti a ni.

Basketball khel thiam zawng zawng zinga a danglamna chu, Isua Krista a rinna hi a ni a. Inkhelhna

tualzawla a awm laia a kutzungchala van lam a kawkhin hi Pathian awmzia leh, a hlawhtlinnaa ropuina changtu chu Pathian a nihzia lantirna a ni. Curry-a’n Bible chang a duh ber leh a innghahna chu Phil. 4:13 hi a ni a. Infiar mite hian Bible hi an inkhelhnaah hian an la lut zing lo viau mai; mahse, Stephen Curry-a hi chuan a inkhelhna pheikhaw (Under Armour)-ah he Bible thu hi a zia thin a, a inkhelh apiangin Basketball Court-ah Pathian thu a la lut thin a nih chu. Curry-a hian Pathian thu leh a rinna hi mi dangte share a chak em em reng a, Pathian ringtu a nihna hi hmuh hmaih theih a ni lo. Hun remchang a hmuh apiangin a rinna thu hi a ngaithla duhtu apiang hnenah a sawi peih reng a ni.

Stephen Curry-a hi tunge a ni an tih : Mark Jackson (Coach, Golden State Warriors, 2011-2014) chuan, “A chet dan leh awm dan thlir hian, ‘Sawtiang saw ka fapa ni se aw!’ kan tih tur ang hi a ni a. A nun dan hian eng mi nge a ni tih leh Pathian ringtu



leh a rawng bawltu a ni tih a pho lang Chiang hle. A nu leh paten an enkawl dan hi a that em avangin, an hnenah kalin an enkawl dan avangin an hnenah lawm thu ka sawi hial a ni," a ti.

Harrison Barnes-a chuan, "Mi lar ka hmuh tawh azawngah chuan a la ingai-tlawm ber awm e. A chhan lian ber chu Pathian a rinna hi a ni. A sawi mai a ni lo va, a nunpui tlat a. Hei vang hian locker room-ah pawh mi dangte zah leh ngaihsan a hlawh phah a ni," a ti.

A tan chuan Pathian thu anga awm hi a nun dan phung pangngai a ni a, amah hi ral atangin ka lo zir thin a, hmai

chhanah pawh a rinna chungchang hi ka lo zawt tawh thin, a nun dan hian ka nun hi nasa takin a khawih danglam a ni." Mi hlawhtling leh mi lar nih te, mite awh leh nun nuam taka hman te hi kan châkin kan duh vek ang. Chutiang kan duhthusam min pe theitu chu Pathian chauh a ni.

Stephen Curry-a pawhin Pathian a rin tlat avang leh zahpui lova a thu a puan chhuah thin avangin Pathian malsawmna a dawng a ni. Pathian kan rin tlata, a thupekte kan zawm chuan kan tana tha tur ang zelin A Malsawmnain min vur dawn a ni.

DUHTHLANNA DIK

– *Lalromani*
Mission Vengthlang

Vawi khat chu mitdel pakhat hi duh an thlantir a. Cheng sanghnhieh note leh lehkhaw khawng nal hen hawn hi an pe a. “I duh zawk zawk i nei thei ang,” an ti a. Ani chuan lehkhaw khawng nal hen hawn chu a thlang ta a.

Tum khat chu driver an la dawn a, mi tam tak an interview a. Driver pakhat chu licence a neih leh neih loh an zawt a. Ani chuan motor lian leh te khalh theihna licence a neih thu a sawi a, a lo nei kim vek reng a. Nakinah chuan, “A nih leh kawng sir teah i kal zai zai thei em?” an ti a. Ani chuan, “Kal thei e, ka kal fo alawm, chung mai mai te chu thil harsa a ni lo,” a ti a. “E, i thiam hle mai. Pawnah lo nghak la, mi dang kan han zawt ve rih ang e aw?” an ti a, a chhuak ta a.

Mi pakhat chu an han zawt ve leh a. Licence eng ang nge a neih an zawt a. A hmaa mi ang bawkin motor te leh lian khalh theihna tur pawh a lo nei vek a. “A nih

leh kawng sir teah i kal zai zai thei em?” an ti ve leh a. Ani chuan, “Ka pu, chutiang-in kawng sir teah ka kal ve ngai lo,” a ti ta a. Tichuan, a ngaihtuahute chuan kawng sira kal zai zai thin ai chuan kal ngai lo chu an la ta a.

Pathian hian Ama anpuia min siam hi a ropui em em a, a thil siam dang ang lo takin duh thlang theiin min siam a. A chhia leh a tha thliar hrang thei kan nihna leh kan duhthlan a dah pawimawh hi kan ropuina tak chu a ni. Pathianin kan hmaah duhthlan tur chi hnih min pe zel a, nunna leh thihna, a chhia leh a tha, a fel leh a fel lo, a dik leh dik lo thlan theihna min pe a ni.

Tu pawh hian harsatna hmachhawn tur leh duhthlan tur chi hrang hrang kan nei vek. A then chu ho te a nih lain a then chu ngun taka ngaihtuah ngai, kan nun dan thlakthleng dawrh thei a ni bawh a. A chang chuan kan thlan tur chiang sa, lang tlang sa a awm thin a, a chang chuan rilru hrehawm tak leh tawrh huama thlan a ngaih chang a awm bawh thin.

Duhthlanna dik chuan kan nunah hlawhtlinna leh hlawkna te, mi tangkai ni thei turin min siam thin. Duhthlanna siam hian kan ni tin nunah nghawng a neih rualin tuna a thatna leh that lohna hriat mai loh, kum eng emaw zat hnua hriat theih chauh te a awm bawh.

Duhthlanna dik siam tur chuan thil lan dan, a hnua lo thleng tur dik tak kan hriat a, kan thlir thiam a pawimawh leh khawp mai. Ka thiante tih ang hi ti ve ta ila eng nge ka chungah lo thleng ang, nakinah engtin nge ka awm zel ang? Hlawhtlinna kawng nge min zawhtir, lungngaihna

leh beidawnna? Ngun taka kan ngaihtuah duhthlanna dik kan siam a pawimawh.

Duhthlanna dik siam tur chuan kan rilru, kan chhia leh tha hriatna kan ngaihtlak a, zawm theih a tha ber. Tih kan chak deuh pawh han ngaihtuah vang vang a, a tha lo a ni tih kan hriatna leh tih kan chak vak lo leh zawm kan chak vak loh pawh rilruin, “Hei hi ti ila a tha zawm ang maw le,” tia min hrih kan zawm hi a tha ber thin.

Internet khawvelah kan cheng tawh a, kan duh duh, kan en chak zawng apiang leh kan hriat chak zawng apiang awlsam tein kan hmu zung zung thei tawh a. Hei tak hi tleirawl tan chuan kal sualna kawng awlsam tak a ni. Kan chak zawng apiang ena, ngaihtlak hi kan tan a lo tha ber lo thin a. Eng hian nge kan nun khalh ngil thei, nun kawng dik min zirtir thei tih kan ngaihtuah ngun a ngai khawp mai. Mit leh beng tihvara, tihvir lutuk te hi kan tan a pawh thei tih hriata, kan inven fimkhur a va tul em!

Driver an interview-a an thlan tak, a chung a kan ziah ang khian duh chuan kawng sirah a kal ve thei reng a; mahse, driver tha chuan, kawng sirah ni lovin kawng lai takah a kal tur a ni tih a hria ang khian duh chuan kan duh duh kan tiin kan en thei a, kan ngaithla thei baw a. Kan tih theih ve reng kan tih duh tlat lohna te, tawrh a ngaih pawha tawrh huama kan tan ve tlatna hi duhthlan-na dik siama, step khat kan penna kawng khat a ni.

Tu mah hian drug addict nih te, zu ngawl vei nih te, rukru nih te hi an tum miah lo vang. Mahse, duhthlanna an siam fuh loh avangin kan chhehvelah hetiang mite hi hmuh tur an awm fo va, a paw hle mai. Mi ropui leh hlawhtling tak ni thei kha an

duhthlanna an hman sual avangin eng mah ni lo, miten engah maha an ngaih loh vah an chhuak thin. Thlan fuh loh chang kan nei thei a, chutiang a nih chang chuan kan rilru kan thlaka, a dik zawk thlan leh mai kha kan tih tur hmasa ber a ni.

A hma entirna pakhat kan pek ang khan, a thlangtu chu a mit a del miau chuan a tana tha leh tha lo a thliar hrang thei lo va. Keini pawh kan tana tha tur hre hrang tur chuan mit var kan neih a tul a, mit var min pe theitu Pathian kan neiha, tih tur dik Pathian kan tiha, kan hriat a pawimawh ber a ni. Pathian hriatna tak tak nen, amah tih chung a kan nun phawt chuan eng lai pawhin duh kan thlang sual ngai lo vang.

Duh thlang turin zalenna i nei teh meuh mai. Amaherawhchu, wawiina duhthlanna i siam hian naktuka i neih tur te, i thawh tur te, i chan tur te a hril vek dawn a ni tih hria ang che.

Zig Zaglar

GOD IS NOWHERE

– Rosangliani
Champhai Vengthlang

Hmanlai hian pa hausa deuh mai, Pathian awm ring lo hi a awm a. A hming chu Pu Henry Denver-a a ni a, America rama Nevada khuua cheng a ni.

Pu Henry-a chu sum-dawng hausa niin, engkim mai hi a nei a, fanu pakhat duhawm em em Sarah-i a nei bawk. A fanu chu a duat em em a, thil dang zawng zawng aiin a hmangaih a ni. Pathian awm a rin tlat loh avangin a in lianpui mai, sitting room bang lai takah chuan, "God is no where," tih inziak hi a tar kuau mai a. Chu chu – Pathian hi khawi hmunah mah a awm lo, tihna a ni. An khuua Pastor-te chuan Pathian thu an hrilh pawhin a ngaithla duh lo va, kal bo turin a ti thin a ni.

Ni khat chu Sarah-i leh a thiante chu thirsakawrin an leng chhuak a, chutih lai tak chuan ruahpui nasa em em hian a rawn sur a, khawpui te a ri dur dur bawk a. Pu Henry-a chuan a fanu chu a

ngaihtuah em em a, luikamah an kal leh ngei dawn tih a hriat avangin a mangang hle mai. Ruah leh thli lah chu a nasa zual deuh deuh mai si a. A mangan em avang chuan Sarah-i zawng turin a tlan chhuak tawp mai a ni.

Lui dungah chuan a zawng thla zel a, darkar hnih darkar thum lai a zawn hnu chuan a beidawng ru ta hle mai a, a awmna hmunah chuan thingthiin a tawngtai ta ringawt a. "Pathian, kei hian i awm ka ring ngai lo va; mahse, wawiinah hian awm la ka van ti tak em! Ka fanu hi veng him la, dam taka a rawn haw phawt chuan i hnung ka zui kumkhua tawh ang," a ti a. Mittui tla zawih zawih chungin haw a tum ta a. Chutia a kal mai tur chu a han hawi kual leh a, in te reuh te,


a pawna thirsakawr lo tlu rum mai a hmuh chuan Pathianin a tawngtai a chhang nghal tih a hria a. Chu in teah chuan a fanu Sarah-i leh a thiante chu him takin a va hmu a, ruah a han hnu chuan an haw ta a.

In a thlen veleh an awmpui pa pakhat chuan hlauthawng deuhvin, "Ka pu, lo tlan teh," a ti a, sitting room lamah a hruai lut a. "Ka

pu, bang hi pakhat mahin a khi si lo va, khi i thu tar khi tek khan a rawn deng phel phawk zuk nia," tiin bangah chuan "God is now here," tih lo intar chu a han kaw k a, "Pathian chu he lai hmunah hian a awm ve tawh," tihna a ni. Tichuan, Pu Henry Denver-a leh a chhungte chuan Pathian rawng an bawl ve ta a ni.

GOD IS NOWHERE

GOD IS NOW HERE



Sinai tlang



Hriatzauna Huang

Lalremmawia

* Naupang tam takin kan nin em em, homework inpek hi a ching chhuaktu chu Italian zirtirtu, Roberto Nevilis-a a ni a. Kum 1905 khan a zirlaite hrem nan homework a lo pe daih tawh a ni.



* Thil hming vuah dan hi a lo inang lo thei khawp mai. British lamin *biscuit* an tih hi USA-ah chuan *cookie* an ti a, *mobile phone* hi *cell phone*, *postman* hi *mailman*, *chewing gum* hi *bubble gum* an ti daih.

* Japan ramah chuan nau piang an tlem lutuk a, naute diaper (Mawng dâwmna) aiin puitling diaper an hralh tam zawk.

* Thei rah zawrha stikker inbel hi a ei theih a. A chârna nen lam hian chaw chi khat ang thova tha zu nia!



* Khawvel mihring zawng zawng tana thla ruk chung daih oxygen pe tur hian dollar trillion 38 (3,80,00,00,00,00,00,00,00,000) a ngai a. Chu chu thingkung hian man lovin min pe a ni. Thingkung hi mihringte tan a lo va hlu tehlul em!

* Sap tawng hi van sanga khawsa thinte tawng hman ber a ni a. Pilot zawng zawng hian anmahni tawng hman lovin, Sap tawng hi an zira an thiam a ngai.

* Dr. Ganesk Rakh-a, Pune daktawr chuan a damdawi ina hmeichhe nau piangte chu man lovin a chhar thin a. Hmeichhe nau piang zali chuang a chhar tawh a ni.

* Switzerland-ah chuan motor khalth zirnaah vawi li lo hlawhchham ta la, i test nawn leh hmam rilru lam daktawrin i hlawhchham chhan a hriat pawt a ngai.

* Syria rama he hmeichhe naupang kum li mi hian, *thla la mi* (Photojournalist)-in a thla a laksak laiin, camera chu silai



em maw tiin, a tlawm tih entir nan tap chungin a ban a phar a ni. Syria tualchhung indo-naah khuan naupang an thi hnemin, nungdamte pawh an khawngaihthlak hlawm hle.

* Iceland khuan ram dangte angin sipai a nei ve lo va, khawvela ram ralmuang bera ngaih a ni.

* Mi hlawhtlingte hian an hmelah thil lantir dan chi hnih an nei a: *ngawih leh nuih*. Harsatna an hneh theih nan an nui a, hatsatna an pumpelh theih nan an ngawi thin thung.

* Kum 1850-a din, USA-a University of Rochester-a zir bing mite chu *hmuh theih loh kawr* (Invisible cloak) sia m chhuaktu an ni.



* England-ah khuan rukru pahnih hian in pakhat an rawk atangin laptop an ru chhuak a. Chu laptop an han en chian chuan naupang khawih chingpenna thil tam tak an hmu ta mai a! Man pawh pawisa lovin police hnenah an report a, laptop neitupa chuan tan inah kum thum a tan phah ta a. Roreltu chuan rukru pahnihte chu an thiltih avang chuan a nep thei ang bera hremin, thla 12 chhung vantlang thatna tur hna an thawhtir ta a ni.

* Kum 2005 khan Sap vakvai pakhat chu television show-a an sum hmuh atangin tanpuina dollar nuai khat an pe a. Chu pa chuan thir-sakawr te, car te, in te a lei a; mahse, rei lo teah zu dawrah zu a in ta fo va, kar khatah dollar singkhat te a hmang ral thin ta mai a. Kum khat a ral hnuah chuan 'The Oprah Winfrey Show'-ah a inlan a, a tlakchhiat thu leh mi vakvai a nih leh tak thu a puang a ni. Nang, pawisa tam tawk nei ta la, engtin nge i hman ve ang le?

CHUNGLENG SAVATEN PUIH AN DUH

– Upa R. Lalthuanga, Durtlang

Kum tam tak liam tawh aţang khan khawvel hnam fîng leh changkang zawkte chuan sava bu (Nest box) siam chawpin, chungleng savate hi hmangaih leh duat takin an lo enkawl tawh thin a. Hetianga sava bu siam hi Zofate zingah pawh he lama tui leh mi thahnemngai, rilru sengtuten an lo hlawhtlinpui tawh tih kan hria a, thil lawmawm tak a ni. Mi taimate hnathawh hian Zofate hmasawna leh hlawhtlinna ropui leh sang takah min hlangkai a ni.



K a n
kawmthlang,
feet 30 vel
leka hlaah
h i a n
thingkung
lian tak

mai lo ding chho hi a awm a, chutah chuan kan sitting room tukverh zawnah ni 8.11.2014-ah he sava bu hi ka dah a. Ni 30.4.2015 (Ni 174 hnu)-ah chuan sava mawi tak mai, vapaw nupain bu chhepin an rawn luah a. Motor ke hmanga ka siam chhan hi, tlo zawk leh kumhlun deuh tura ka rin vang a ni.

A hnuai ft. 8 vel lekah thing hmanga nest box ka siam ka dah bawk a. A chung zawka vapaw nupa an luh aţanga hapta hnih lek ral hnuah khawmualchinrang

nupain an
rawn luah
ve leh a.
Zing khaw
var tirh
aţ a n g i n
heng khaw-

mualchinrangte hi mawi taka hram chungin an thlawk kual a, an han inchhah vel han en chu, rin aiin en rei a awl a, zing thawh pawh a tinuam hle thin.

Heng aţang hian, chungleng savate hian ţanpuitu an duh tih a hriat theih a. Pathian thuin, “*Chungleng sava chungah te, thil nung leia bawkvaka kal zawng zawng chungah te thu nei baw rawh u,*” a tih (Gen. 1:28b) kha tihlawhtlingin, nang leh kei hi an tan malsawmna kan ni thei a ni tih i hria ang u.



HRE THEI RAWH

1. Mizo zinga baptisma chang hmasa berte kha Khuma leh Khara an ni a, eng tih kumah nge an chan?
2. India ram Rajya Shaba Speaker tang lai tu nge?
3. World Cup football-a champion hmasa ber ram kha khawi ram nge?
4. *Common Sense* tih lehkhabu te reuh te, khawvel huapa lar pha kha tu ziah nge?
5. Mihring zinga tualthat hmasa ber kha tu nge?
6. Lokh Sabha Speaker tang lai tu nge?
7. Europe rama Kristianten kum zabi sawm leh pakhatnaa Muslim-ho kut ata ram thianghlim lak let an tumna beihpui kha eng nge a hming an vuah?
8. Bible-a Juda-te bukna lian ber eng nge?
9. India rama mihring tam berna state i hria em?
10. Thuthlung Thara Kristian martar hmasa ber tu nge?

1. Kum 1898; 2. Venkaiyah Naidu; 3. Uruguay; 4. Tho-
mas Paine; 5. Kaina; 6. Sumitra Mahajan; 7. Crusade; 8.
Talent. 9. Uttar Pradesh; 10. Stephana.

PAHOM-A CHANCHIN


– *Lalremmawia*
Jt. Editor

Vawi khat chu khawpuia cheng nu pakhat hian a nau, thingtlanga lo neitu pasala nei hi a tlawh a. An titina lamah chuan khawpui nun nge nuam zawk lo neitu nun tihah an inhnial ta a. A u zawk chu – khawpuia awm chu thawmhnaw tha zawk, ei leh in tur tuihnai zawk leh intihhlimna chi hrang hrang te a awm a, a nuam zawk a ni, tiin a tang a. A nau chu – lo neih chu hahthlak viau mah se, amah leh a pasal chu an zalen a, ei tur duhtawk an nei a, khawvel thil awhnain a tibuai ve lo, tiin a tang ve thung a.

Pahom-a, a nau zawk pasal chuan an inhnialna chu a lo hria a, “Lo neih nawm em emna chu, lo neitu ngaih-tuahnaah chuan thil ho mai mai ngaihtuahna a awm hman lo a ni,” a rawn ti ve a. “Lo neitu nuna harsatna awm chhun chu, duh ang tawka zau ram a awm lo hi a ni,” a rawn ti zui a. “Ram zau tak nei ila chu, Setana pawh hi ka hlau hauh lo vang maw le,” a rawn ti a. Chutia a tangw chu Setanan a lo hria a, Pahom-a chu a duh ang ngeia ram zau tak nei tura thlem a tum ta a.

Pahom-an ram a neih belh theihna tur hun remchang chu a rawn inhawng ta thuai reng

a. Chu khuuaa nu pakhat chuan a ram, tin zathum hmun (Acre zathum) zeta zau chu hralh a duh hlauh mai a. A lo neitupuite chuan inlei tangw dan an ngaihtuah a; mahse, Setanan an zingah buaina a rawn siam a, a huhova lei thei lovin, a hran te tein an leisak ta zawk a. Pahom-a pawhin tin sawmli hmun lai chu a leisak a. A tirah chuan a lawm viau va; mahse, rei lo teah a thenawmte chuan a lovah



chuan an bawngte an rawn tlattir a, an sakawrte chuan a buh kung te chu an rawn pal chhiatsak ta thin a, roreltute hnenah a zualko a lo ngai ta a. A buh leh thlai tihchhiat tanpuina dawn chu sawi loh, a thenawmte leh tun hmaa a thiante nen chuan an inngeih thei ta lo va; a ram neih belh chuan hlimna a pe ta hlek lo mai a.

Tlang kam atangin, hmun dangah ram zau zawk leh tha zawk a awm thu a lo hre ta a. A ram chu hralha, an chhungkuua hmun danga pem a rilruk ta a. Tichuan, ram tin 125 hmuna zau, a hmaa mi aia a let sawma tha zawk chu a lei ta a, a lawm em em a. Chutih lai chuan, a ramah chuan wheat ching ta se, a hlawk zawk dawn hlein a hre nghe nghe a. Rei lo teah, lo neitu rethei, sum leh paia tlachhiate hnen atangin *ruble* (Russia pawisa) sangkhat chauhva ram tin 1,300-a zau lei belh tura ruahmanna a siam leh mek laiin, Bashkir-ho ram chanchin an sawi chuan a beng a verh ta zar mai a. Sumdawng pakhatin a hrilh dan chuan, an lalte an kawmngleih phei chuan


duli lek pawhin ram tin khat hmun laia zau te an lei thei hi a ni awm a.

Ram zau zawk, tlawm zawk leh tha zawk neih chaka tuihal, Pahom-a chu ram a mamawh tawka zau nia a hriat neih tumin Bashkir-ho awmna lam pan chuan a zin chhuak ta a. A va thlen chuan Bashkir-ho lalte chu thil chi hrang hrang a pe a, mi hawihhawm leh kawm nuam tak an niin a hria a. An hnenah chuan chuta a kal chhan chu a hrilh a. Lalho chu hun eng emaw chen an inngaihtuah hnuah, a duh anga ram zau chu *ruble* sangkhata lei an phalsak ta a. Pahom-a chu a lawm em em a; mahse, kaihhnawih a nei chuan a tibuai deuh va. An thutlukna chu amahni leh an thlah kal zelten an tihbuai loh nan ram chin ziah felna lehkha te, ram leina lehkha te, lei phalsak a nihna te a mamawh a.

Bashkir-ho chuan a duh ang chu an hriat thiamsak a, inremna an ziahpui ta a. Pahom-a chuan ni khata a kal hual theih ram zawng zawng chu *ruble* sangkhatin a lei thei dawn ta a ni. An intiamna pakhatah chuan, a kal tanna

hmunah chuan chumi ni la laa a rawn thlen leh loh chuan a pawisa chu a chan thung dawn a ni. A kal hma zan chuan Pahom-a chuan a rilruin rem a ruat lawk nasa mai a. Mel sawmthum leh pangaa zau kal hual a tum ang a, ram chhe lai deuh chu lo neitute hnenah a hralh ang. A tuka a harh veleh chuan, Bashkir-ho lal ni awm tak hian a rawn hmu a; mahse, lo neitu, a in hluia lo kala, hmun dangah ram tha tak a awm thu rawn hrilh tumtu niin a hre leh a. Chiang lehzualin a'n en a, ramhuai ni maiin a hmu ta a. Chung chu a mumang lek a lo ni a. Tichuan, kal tan tur chuan a inbuatsaih ta a.

Pahom-a chu hlim takin a kal tan a; mahse, ram zau zawk kal hual a duh ta zel a. Chhun a lo thlen chuan a kal hual zau lutuk a ni tih a hre ta a. Hah lutuk vanga thih mai hlau tak chungin, a tih tur awm chhun chu a kal tan naa thlen leh ngei chu a ni tih a hria a. "Ram chu ka nei zau dawn ta hle mai a. Mahse, Pathianin a chhungah min chentir ang em le?" tiin a ngaihtuah a. Ni a tlak dawn ruai lai chuan, Pahom-a chu a



kal chhuah tanna hmun thleng turin a chakna zawng zawng sawm khawmin a tlan tang tang a. A va thlen chuan lal chuan nui uar uar chungin a lo nghak a; a mumang chu a hre chhuak a, a thaw a chham a, a thi zui ta mai a. Pahom-a chhiahhlawh chuan suahdur a la a, Pahom-a tlukna chin lei chu a rin kual a, amah phumna tur thlan a lai ta nghal a: "A chhip atanga a keartui thlenga a ram mamawh zawng chu fit ruk a nih hi," a ti a.


Lal Isuan, "Miin khawvel hi a pumin nei sela, a nun chan si sela, a tan eng nge sawt ang?" a lo ti a (Mk. 8:36) Pahom-a chu a duham lutuk a, ram zau tak a neih tur pawh luah tur a awm ta lo a ni.

(Kum 1886-a Leo Tolstoy-a thawnthu tawi ziah, 'How much land does a man need?' tih atanga lehlin a ni e. - RMA)

CHEI RAWH LE!



A nalh dan tur ang berin
han chei leh phawt mai teh le...



1-grey

2-brown
5-blue3-green
6-purple

4-yellow

ZAWNCHHUAH



A chung a milem hi ngun takin en la, a inan lohna paruk han
zawng chhuak teh le.

- 1
- 2
- 3
- 4
- 5
- 6

To,



**Thenzawl Field Veng Kohhran
Naupang Sunday School**

Published by Rev. Dr. C. Chawngmnglana
Synod Literature & Publication Board, Aizawl and
Printed at the Synod Press, Mission Veng, Aizawl - 796 001.

Copies - 30,500